



Peruntukan RM10,000 untuk MPP di semua kampus UiTM - Zahid

Oleh [Amirul Aiman Hamsuddin](#) - Mei 18, 2023 @ 6:06pm
bhnews@bh.com.my

KUALA SELANGOR: Timbalan Perdana Menteri, Datuk Seri Dr Ahmad Zahid Hamidi mengumumkan peruntukan RM10,000 kepada Majlis Perwakilan Pelajar (MPP) di semua kampus Universiti Teknologi MARA (UiTM) seluruh negara.

Beliau berkata, peruntukan itu bertujuan memudahkan MPP berinteraksi dengan mahasiswa serta menjalankan aktiviti berfaedah.

"Untuk pertengahan tahun ini, saya berikan RM10,000 kepada setiap MPP dan saya minta mereka buat aktiviti mengikut garis panduan.

"Pada akhir tahun ini kalau mereka membelanjakan mengikut garis panduan diberikan, saya akan ikhtiarkan untuk tambah lagi RM10,000," katanya.

Beliau yang juga Menteri Kemajuan Desa dan Wilayah berkata demikian ketika berucap pada Majlis Riang Raya MPP UiTM bersama Timbalan Perdana Menteri di Dewan Berlian di UiTM Puncak Alam, di sini, hari ini.

Yang turut hadir, Pengurus Lembaga Pengarah UiTM, Prof Emeritus Datuk Dr Raduan Che Rose dan Yang Dipertua MPP UiTM Shah Alam, Mohamed Yusuf Hassan Roslan.

Berhubung garis panduan ditetapkan, Ahmad Zahid menegaskan ia bertujuan menangani masalah dalam kalangan pelajar terutamanya yang datang dari keluarga tidak berkemampuan.

"Garis panduan ini termasuk aktiviti motivasi dan sebagainya ketika cuti semester.

"Mereka harus pergi ke kawasan desa untuk membantu anak-anak desa bagi diberikan motivasi memasuki institusi pengajian tinggi (IPT).

"Itu antaranya dan banyak lagi program yang perlu ikut garis panduan," katanya.

Ditanya bila peruntukan itu akan disalurkan, beliau memaklumkan ia akan dibuat dalam tempoh terdekat.



Ahmad Zahid ketika hadir pada Majlis Riang Raya MPP UiTM di UiTM Puncak Alam, Kuala Selangor. - NSTP / FAIZ ANUAR